

# Rûbarê mezin

**Nivêsin: Arîf Elxetîb**

**Wergêran: Fehîma Îbrahîm Abdulla**

Çipkên baranê ji zîndana hewrê reş û tarî veristin û ber bi erdê ve hatin xwarê..

Çipkekê got:

- *Çi xweşiyeka mezine, em ji zîndana hewrê reş rizgar bûn.*

Ya dî bersiva wê da û got:

- *Û çî mifa tê da heye, heger piştî çendeka dî em dê bimirîn?*

Çipka siyê xwe kire di ber re û got:

- *Heger me bivêt bijîn, divêt em yek bigirîn û yekgirtin di navbera me da çêbibe.*

Sîmayên çipkên baranê geş bûn, dengên pesendkirinê bilind bûn.

- *Me divêt bijîn, em hez ji jîyanê dikin.*

- *Me nevêt bimirîn, em hez ji mirinê nakin.*

- *Me yekgirtin divêt.*

Demê çipkên baranê ketîne erdê, hemûyan xwe nêzîk yek kir, bi sozdarî hevdu hembêz kirin, bi bawerî û viyan yek girtin, wesa rûbarekê bilqhavêj pêk hînan. Kenarên wî bi gulan xemildar bû..

Zarok çûne ber lêva û bi viyan gotin:

- *Ev rûbare çendî ciwane?*

Rûbar bû hevalê zarokan.. Yarî li nik dikirin û melevanî di çihên meyavên wî de dikirin.. Çipkeka baranê ya debeng got:

- *Çend caran min bîhist zarokan digotin;*

Ev rûbare çendî ciwane, lê kesê navê me çipkên baranê nehînaye, erê ew nizanin bêyî çipkên avê, çî bûhayê rûbarî nîne?

Çipkeka şareza bersiv da:

- *Hevala min, me jî bêyî wî rûbarê mezin ewê me lêk kom ve dike çî bûhayê xwe nîne.*

Ev axavtina te li nik min bi çî naçe û min biryar daye.

- *Te çî biryar daye?*
- *Ez dê ji rûbarî cûda bim.*
- *Xweştiviya min we nekî.*
- *Bo çî we nekim?*
- *Ditirsim tu bimirî.*
- *Ez namirim.*
- *Yên bê hêz heger jêk vebûn dimirin.*
- *Ez ne ya bê hêzim.*
- *Tu çend ya rikoyî?*

Çipka debeng ji biryara xwe nehate xwar, lewra bi ser kinarê rûbarî ket, barûveyekê lêda û digel xwe bir di nav pêlên bayê de hinçinî û pûç bû. Li roja dî, çipkeka dî jî ji rûbarî cûda bû, bi ser berekî ket, pîçleka germê lêda û sot berî bigehîte kinarê rûbarî.

Li roja siyê jî, çipkeka dî jî cûda bû, lê demê gehîştîye kinarê rûbarî, kerek bi lez dihat û bêyî xwe dana ser û pirçiqand û çî jê nehate dîtin.. Piştî hingî, çipkên avê baş zanî, bêyî hevgirtin ewan çî jiyan nabe, lewa çî çipkên dî bizava cûdabûnê ji rûbarê mezin nekir.

